

國

朝

列

卿

紀

國朝列卿紀卷之三

中書省左右丞年表

湯

和

見平章吳元年任左丞

王

溥

江西安仁人元末歸附吳元年任右丞洪武元年兼副詹事三年食祿不署事後卒於京

吳

宏

江西餘干人元末歸附吳元年任左丞尋遷指揮使後卒於京

趙

庸

直隸合肥人元末歸附吳元年任左丞洪武三年封南雄侯後卒於京

楊

憲

山西陽曲人儒士洪武二年任右丞三年改左本年伏誅

汪

廣洋

詳丞相洪武三年任左丞

胡

惟庸

詳丞相洪武四年任左丞

殷

哲

山東膠州人洪武初貢士十二年任左丞本年致仕

中書省左右丞行實

湯和詳平章癸卯年任左丞

王溥字

江西饒州府安仁人仕陳友諒爲平章守建昌頗

著聲望弟漢名漢二亦爲友諒守將

太祖南征嘗命師取建

昌不克歲辛丑正月院判朱亮祖率兵擊溥於饒州之安人港

溥以兵拒戰我師不利六月友諒將李明道寇信州胡大海引

兵來援擊破之擒明道并漢二等十八人因送之朱文忠文忠

令二人招溥復送建康

上命皆仍舊職八月

上帥師討友

諒取江西以爲鄉道江州旣拔友諒奔走武昌溥遂以九月已

酉朔遣使來降俾仍守建昌已而龍興守臣胡廷瑞亦具書納

款壬寅正月 上至龍興溥率衆來見 上慰勞之尋遣率兵
取撫州及江西未附諸郡是年元張昶之來溥實遣人報於

上甲辰從克武昌遷資善大夫中書右丞洪武元年諸功臣進秩
詔溥兼副詹事從大將軍克平山東河南燕冀二年克陝西屢
有戰功賜文幣七表裏三年十二月天下既定論功行賞陞河
南行省平章 上欲優待之令食祿而不視事子孫世襲指揮
同知十一年定諸臣歲祿之數刻石官署溥每歲七百五十石
於官田內給與與平章李伯昇潘原明祿同五年五月溥遣人
來言近督取林木建昌蛇舌巖衆見巖上有衣黃衣者歌曰龍
蟠虎踞勢岩巖赤帝重興勝大朝八百年終王氣復重華從此

繼唐堯其聲如鐘歌已忽不見 上曰明理者非神怪可惑守
正者非讖緯可干漢之文成武利足以爲戒事涉妖妄豈可信
也後卒於京龍飛記云溥以饒信干戈倣擾奉其母葉氏避兵
貴溪倉卒間母子相失凡十八年葉氏所在不可知而溥思母
亦切是歲正月忽夢母若告以所在者命卜者筮之其繇辭曰
非巖卽穴朽骨是藏及是溥言於 帝曰臣之父晉母葉氏實
生臣溥及弟漢寶而臣不天父也葉諸孤蚤所恃者吾母以長
以教故臣兄弟稍有成立而母亡已十八年微臣無似獲事

陛下比者推恩褒崇三代假寵於王氏甚厚獨念臣去鄉邑日久
倘賜之告得歸展省丘墓以伸私情臣不勝至願 帝爲惻然

有制與之所以撫諭之者亦至仍命儀曹具祭物給之溥卽日
回家躬率士卒詣貴溪之桃源山向母舊時避兵之處伐木入
山以物色求之不得夜號者三日旣乃得其居人吳海能言賊
兵逼時夫人病不能行卽自投井中死矣溥又披榛棘尋得井
俄有鼠自井中出跳入懷中旋復入井汲井索之葉氏遺骸果
在溥哀號益不自勝乃具衣衾棺槨卽其地葬之

吳宏字

江西饒州府餘干人仕陳友諒爲江西行省叅政

守餘干至正庚子七月鄱陽院判於光取饒州以其城來附

上命僉院鄧愈往鎮之屢殲友諒舟師威震境內宏深懷疑沮辛
丑愈以江南叅政行總制事推誠結納撫以恩信宏大感激會

上親取江州友諒奔武昌遂全城請降 上嘉其誠命招諭龍興

壬寅正月 上至龍興宏率衆來見 上慰勞之遂改愈爲江

西叅政移鎮龍興宏代守饒州尋遣率兵取撫州等郡調守撫
州又從征下武昌以功拜中書左丞後遷親軍指揮宏涉獵經
史能詩工書奉母至孝見重於士大夫後卒於京

趙庸字老哥直隸廬州府合肥縣人僉院趙伯仲弟也元季兵
亂伯仲集義旅屯巢湖觀望時變會俞廖諸將歸於和陽伯仲
亦率所部舟師及庸來附乙未六月從渡江拔采石克太平丙
申定金陵累立戰功陞僉行樞密院事陳友諒陷太平誘殺安
慶守將趙普勝 上遂克安慶命伯仲守之友諒遣兵復破安

慶伯仲道走直至龍江事聞 上怒曰主將不能堅守城池失陷遠遁宜照失城池誅之常遇春諍曰伯仲係渡江勳舊冀曲赦之 上曰不依軍法無以戒後人竟處以死令其子孫襲職庸以兄故 上特授僉院辛丑從破安慶九江壬寅下南昌及分兵取江南諸郡陞叅知政事癸卯四月陳友諒發國中兵圍南昌期必拔圍且三月守將告急七月丙戌從 上率諸將往征既至友諒解圍出鄱陽以迎我師大戰於康郎山戊子巳丑庸與諸將連擊敗之庚寅庸及俞通海廖永忠等以舟師深入搏擊之敵兵大敗庸等還 上勞之曰今日之捷諸君之力也八月友諒欲自湖口逸去庸等邀擊之友諒中流矢貫睛及

顛而死擒其太子善兒平章姚天祥其子理奔武昌復稱帝尤
月 上還建康論功賜庸金帛甲辰從平武昌回克廬州拔安
豐乙巳十月 上以淮東僞吳之藩燕命徐達馮勝等率步騎
庸與葉高率舟師水陸進取十一月克海安十二月克泰州丙
午三月破高郵四月下淮安庸皆有功八月從伐張士誠克昇
山水寨拔舊館下湖州并兩浙西進圍蘇州與諸將分門而軍
各嚴所部四面困之吳元年九月城破士誠就縛師還 上詔
庸於戟門賜采段表裏各六陞資善大夫中書左丞仍降褒諭
爾等今日之功無忝古之名將且謂江南旣平當北定中原以
一天下十月從大將徐達取山東十一月克沂州益都十二月

下濟南戊申正月 上卽帝位改元洪武諸功臣進秩詔庸以
中書左丞兼太子副詹事二月克東昌取棣州三月克汴梁回
月率步騎自中灣進取河南又自虎牢關進至河南塔兒灤元
將詹同脫因帖木兒戰敗將散卒走陝州遂進營於河南城北
門其行省平章梁王阿魯溫送款軍門遂克河南達命庸守之
七月達旣拔關陝擇將鎮禦遂班師謀取元都庸與諸將各領
軍衛分布士馬渡河徇取河北州縣閏七月克衛輝下彰德取
廣平至臨清趨德州克長蘆直沽河西務通州八月庚午克元
兵九月克河間守之大軍尋下保定中山真定十一月徐達至
真定會常遇春於柳亭調庸守保定令收諸未附山寨十一

從克太原二年從下陝西鳳翔鞏昌臨洮諸郡走張良弼降李
思齊五月元將也速兵侵通州 上命庸從常遇春率兵東還
拒之遂搗永平敗元將江文靖於錦川獲士馬以千計至大寧
也速遁破開平元君又北奔追至北河俘其宗王三人及平章
鼎住等凡得軍士萬人車萬兩馬三千牛羊五萬師還燕時慶
陽未下 上命庸副李文忠率師往應徐達合攻之八月癸亥
庸自北平行至太原聞元兵攻大同文忠謀於庸曰吾與若等
受命而來闔外之事有利於國者專之可也今大同受敵甚急
若候進止豈不失機庸曰諾遂由代出鴈門至馬邑適邏騎數
千奄至猝遇我師與戰敗之擒其平章劉帖木進次白楊門前

軍已駐營去敵五十里文忠至命遷之復前五里許是夜將脫
列伯悉銳來攻我師先以兩營誘敵自寅至辰度其饑疲乃分
一軍爲左右翼奮擊大敗之生擒脫列伯縛於軍門降其衆萬餘
獲馬匹輜重無筭遂進兵東勝州莽哥倉而還先是元主北走
屯葢里命脫列伯孔興以重兵攻大同欲圖恢復當是時脫列
伯被擒孔興走綏德其部將復斬之來降元主知事不濟無復
南向未幾慶陽亦平十二月上大賞平定中原諸將謂左丞
趙庸從大將軍克山東河南燕冀秦晉等處州郡又從開平王
白陝西復取上都後充副將軍同平章李文忠總兵山西應接
大將軍乘勝勦捕生擒脫列伯驗其功勞賞白金二百兩文忠

十九表裏三年正月同文忠領兵征伐二月師出野狐嶺降其
守將進師察罕怙兒擒其平章祝真三月甲午同文忠敗元太
尉蠻子平章沙不丁朶兒只八刺等於白海子之駱駝山遂進
次開平獲元平章上都罕等五月十五日同文忠率師北至應
昌克其城獲元君之孫買的里八刺及后妃官女金寶玉冊省
院諸官知元君於四月二十八日以疾殂太子愛猷識理達臘
以數騎北奔追之不及而還又至苦脫孫追太尉蠻子及奧魯
擒元平章伯答兒獲馬駝無筭過中興擒元將江唐國公進攻
紅羅山擁兵自固者皆請降大軍所至朝廷遂空十一月師還
京丙申大封功臣 上諭諸將曰今日定功行封皆至公而無

私如趙庸從平章李文忠取應昌其功不細然有小過止封爲
侯乃授開國輔運推誠宣力武臣榮祿大夫柱國同知大都督
府事封南雄侯食祿一千五百石令子孫世襲 賜誥命鐵券
其文曰朕聞自昔佐興王業之臣有父及其子兄及其弟心實
嘉之世常罕見也當朕創業之初師駐和陽爾兄趙伯仲以所
部舟師從人來附東渡大江如履平地乃克采石定金陵從征
安慶侵其城因非命自却罷職而逝念其初附之誠授爾庸以
官督府中書歷任樞要比歲從大將軍下淮東平浙右復任北
伐以取齊魯汴洛燕翼秦隴勛績著焉今天下已定論功行賞
朕無以報爾是用加爾爵祿使爾子孫世世承襲朕本疎愚皆

遵前代哲王之典禮茲與爾誓若謀逆不宥其餘若犯死罪爾
免二死子免一死以報爾功於戲爾能鑒兄之不謀奮志超羣
多建奇功而雲中之捷威聲尤振際遇今時可謂千載之一會
尚其益宜勤勞訓及子孫享祿位於永久仍賜文綺及帛二十
四疋尋命視都督府事四年伐蜀克歸州李逢春烽火山寨取
桑植容美洞攻茅岡覃廬寨平之十四年秋閩南廣東羣盜爲
亂勢猖獗上命庸率師討之十月漳州南靖民亂掠鄉邑庸
遣兵擊捕其黨盡平湖州海陽民亂調兵平之擒賊千餘并其
家屬二千七十一人十一月程鄉盜竊發虜軍破其衆擒賊首僞
萬戶饒隆海等一百五十人斬首四十餘級十五年正月討東

筦諸盜凡克寨十二擒賊首二千級招降翁源等縣復業人民
三千餘戶進兵攻破石鼓赤嶺等寨擒偽官百餘人其黨潰散
由是四會縣滿白沙長岡太冲口山河田陳家坊各處父老迎
拜於道庸慰諭而遣之是月龍川河源民自稱李元帥合龍南
民作亂卽發兵捕獲賊五百七十餘人閏二月率兵討陽山歸
善等縣蠻寇平之又克燈心龍湖龍歸大牛成家塘潭源洞生
擒賊首萬戶營長都公少公等數十人斬首千餘級招降二千
九十戶事聞命賞將士有功者綺帛各有差三月籍廣州疍戶
萬人爲水軍時疍人附海島無定居或寇盜故籍而用之十月
討平廣東羣盜俘賊首號鍾平王者凡獲賊黨一萬七千八百

五十人賊屬一萬六千餘人斬首八千八百級招降其一萬三千二百六十七戶 詔庸班師至京入見 上慰獎殊至賜綵幣上尊良馬十二月 命山西理軍務賜鈔遣行十六年春巡撫北邊訓練士卒至冬召還洪武二十六年卒庸與伯仲初焉分路揚鑣旣而監兄之覆轍範我馳驅卒以致遠西擊秦關北衝燕壁無不如意至感吳踣漢如出一軌其功烈當與傅穎公廖德慶並驅而爭先若餘將瑣瑣者當之則駑攀驥乘十駕莫及庸之所自立者固卓矣或者不稽其然徒從人妄議其所終不幾於侏儒觀場者乎是故與功者不徇名論人者必考實

楊憲字希武山西大原府陽曲縣人初名慈少從父寓江南丙

申年 王師克集慶以儒士錄用留左右叅議憲美姿儀通經史有才辨本年使僞吳張士誠拘留不遣踰年放還除博士廳諮議擢江南行省都事時軍國多事征調日發文書委積憲裁決明敏然深刻猜忌有不足於已輒中傷之出爲山東行省郎中庚子年又使方國珍有口才善諭禍福國珍以寧紹合來附還奏稱 旨陞按察使遷中書省叅議癸卯年出爲江西行省叅政 命總理饒州軍務召入爲司農卿時浙西初平憲以其民富實增其賦畝加爲二倍徵其稅民不堪命皆怨之 上不之知有揚州人陳敦禮者善滑稽號憲加賦爲揎田吳元年陞中奉大夫叅知政事憲在上左右旣久熟於典故市權夤寵輕

視同列人莫敢與抗嘗頌上功德日勤行督責之政上曰
欲使我失人心也不聽與張昶同在中書以昶才出已右構害
之昶坐誅自是無憚專恣日甚十月詔定律令命憲爲議律官
上謂省臣曰法有連坐之條謂侵損傷人者以爲鞠獄當恕非大
逆不道則罪止及其身先王之政罪不及孥罰弗及嗣忠厚之
至也自今民有犯者毋連坐叅政憲對曰先王用刑世輕世重
自元政姑息民輕犯法非重治之則犯者益重上曰民之爲
惡辟如衣之積垢加澣濯則可以復潔污染之民以善導之則
可以復新夫威以刑戮而使民不敢犯其爲法也殘矣洪武元
年命兼詹事府丞改今名本年改署河南行省叅政事二年詔

山西是年召陞中書省右丞三年遷左丞憲欲盡變中書省凡舊吏一切罷黜更用已所親信欲持權乃創爲一統山河花押示僚吏以觀其從違附已者不次超擢否者去之以示編修陳桎桎賀曰押字大貴所謂只有天在上更無山與齊憲大悅數日奏陞桎翰林待制以奏對敏捷甚爲帝所信任會 上欲以憲爲相問於中丞劉基基與憲素厚謂其不可以相曰憲有一相才無相器宰相者持心如水以禮義爲權衡而已無與焉今憲不然寧無敗乎又問汪廣洋胡惟庸何如俱對不可相三年李善長病中書無官召汪廣洋爲右丞相憲因劾廣洋陰事免廣洋官又不以爲慊使御史劉炳奏徙之海南 上不從又教

炳誣奏刑部侍郎左安善入人罪 上覺之下炳獄善長奏憲
排陷大臣放肆爲奸 上命羣臣按治殺之

汪廣洋詳丞相洪武三年任左丞

胡惟庸詳丞相洪武四年任左丞

殷哲字

山東萊州府膠州人洪武初以貢士入大學有才

識授翰林應奉歷四川重慶府知府時蹇忠定始從里社師一
見器之引充郡學弟子員語其師曰是兒將來遠到非吾所及
當成就之十二年任叅知政事改左丞本年致仕

國朝列卿紀

卷之三

三

三

國朝列卿紀卷之三終

國朝列卿紀卷之四

中書省叅知政事年表

李善長

詳丞相國初
辛丑年任

趙庸

詳左丞國初
壬寅年任

張昶

順天宛平人元末歸附
國初丙午年任尋伏誅

蔡哲

湖廣武昌人元末歸附吳元年任洪
武元年調福建叅政歷侍御史免官

楊憲

詳左丞吳
元年任

傅璪

湖廣松滋人元末入仕吳元
年任洪武元年兼詹事府丞

汪廣洋

詳丞相洪武元
年十二月任

劉惟敬

人洪武元年任大理寺卿十二
月陞叅知政事三年三月改廣西叅政

睢稼

二年任三年改弘文館學士
人國初舉文學洪武

陳寧

湖廣茶陵人元末府掾洪武二年任歷御史大夫

胡惟庸

詳丞相洪武三年任

丁玉

直隸人元末入仕洪武六年任九年陞右御史大夫

馮冕

河南孟縣人洪武初舉儒士六年任九年改刑部尚書

殷哲

見左丞洪武十二年九月任

中書省叅知政事行實

奔善長詳丞相國初辛丑年任

趙庸詳左丞國初壬寅年任

張昶字

順天府宛平縣人仕元爲戶部尚書辛丑年來附

江西行省平章王溥遣人報於上命仍其官甲辰年陞中書

右司都事丙午年陞中書省叅知政事外示誠款內懷陰計與

楊憲胡惟庸皆相善昶有才辨智識明敏熟於前代典故凡國

家建制度多出昶手裁決如流事無停滯昶恒自以元臣失節

謂不能無議已者心常怏怏時擴廓帖木兒兵尚強元都未下

昶私語其所親曰吾若得歸元仍不失富貴也間陰使人上書

頌功德勸

上以時娛樂

上以語太史令劉基曰是欲爲

趙高也基曰誠如

聖見必有使之者

上不欲窮治但斥之

焚其書後復勸

上重刑法破兼財之家多陳厲民之術欲

上失人心陰爲元計

上皆不聽昶懼不安時元主謂昶已死贈

昶官謚擢用其子會平章李文忠下杭州以元平章長壽丑的

等至京師

上釋之遣歸元昶乃陰託長壽丑的奉表於元且

寄書其子詢存亡會昶臥病憲往候偶於昶臥內得書藁遂奏

之

上令大都督府按問昶書八字於牘曰身在江南心思寒

北

上始惜其才猶欲存之及得其所奏書牘詞曰彼叛意缺

矣是不可赦遂伏誅

蔡哲字思賢湖廣武昌府武昌縣人元末仕陳友諒爲御史于
寅附王師授江西行省理問陞右司郎中 命往贛州招諭熊
天瑞天瑞遂遣使入朝上嘉之擢中書省叅議陞叅政吳元年
改授江西按察司僉事尋陞浙江行省叅政本年復入爲中書
省叅政命往四川報僞夏明昇聘因挾畫士同往圖其山川險
易以獻洪武元年出爲福建行省叅政臨行諭之曰君子立身
行已莫先於辨義利夫義者保身之本利者敗名之源常人則
惟利是徇而不知有義君子則惟義是守而竟忘乎利此所以
異於常人也福建地瀕海民物庶富番船往來私交者衆往時
官吏多爲利怙陷於罪戾 命卿往必堅所守毋蹈其罪蔡哲

對曰臣以菲薄叨承恩命敢不盡公以報 帝曰公卽無私義之謂也私卽無公利之謂也要之公之一字亦未易言此心如止水明鑑無分毫私意累之然後揆事度物廓然無滯若使胸中微有芥蒂卽不得爲公矣卿宜勉之哲頓首受命二年召爲侍御史三年十月以所舉御史犯法爲廷臣所劾坐免官尋卒上深惜之 命賜棺歸葬鄉里

楊憲詳左丞吳元年任洪武元年兼詹事府丞

傅璫字

人初名玳元末入仕留侍左右吳元

年陞中書省叅知政事本年詔定律令命爲議律官諭璫曰汚染之民以善道之則可以復生求生於重典是索魚於釜也及

律令成付按察司巡歷州縣使內外知所遵守洪武元年正月
命兼詹事府丞二月同左丞相李善長學士陶安進郊社宗廟
議八月京師火 帝謂中書省臣曰近京師四方水旱相仍朕
夙夜不遑寧處豈刑罰失中武事未息徭役屢興賦歛不時以
致陰陽乖戾而然邪卿等同國休戚宜輔朕修省以消天譴
等對曰古人有言天心仁愛人君則必出災異以譴告之使知
變自省人君遇災而能警懼則天變可弭今 陛下修德省愆
憂形於色居高聽卑天寶監之類臣等待罪宰府有垂憐憫胎
聖衷憂咎在臣等 帝曰君臣一體苟知謹懼天心方回卿等其
盡心力以匡朕之不逮二年改禮部右侍郎三年以年老致仕

汪廣洋詳丞相洪武元年任二年出叅陝西

劉惟敬卽惟謙

人吳元年以才學舉任大理寺少

卿洪武元年擢大理寺卿定律令本年設六部改刑部郎中十
二月遷叅知政事二年改廣西叅政詳刑部尚書

睢稼字

人元末入仕以文學侍左右多所啓

沃擢翰林應奉洪武二年陞中書省叅知政事冬十月十三日
甲戌膏露降於乾清宮後苑蒼松之上光潤如酒凝結如脂又
如珠昉白飴甘彌布松柯聲冽氣遠左右勃鬱淋漓薰灑大酥
丙子日李善長率羣臣稱賀帝曰甘露之降載在往牒然休
咎之徵當以類應朕惡足以致斯卿等爲朕明言之稼對曰聖

人之德上及太清下及太寧中及萬民則膏露呈瑞 陛下敬
奉天地輯和人民故天不愛寶使嘉祥徵顯也 帝推而不居
三年改弘文館學士餘詳國初侍臣

陳寧字

湖廣長沙府茶陵州人元末爲鎮江小吏以代武

人單師言事

上覽之甚喜召見擢江西行省掾史己亥陞廣

德知府辛丑除樞密院都事癸卯改按察司僉事甲辰陞浙江
按察使己巳拜中書叅議降大倉市舶令洪武元年入爲司農
卿遷兵部尚書二年出爲松江知府陞中書省叅知政事三年
坐事知蘇州府詳右御史大夫

胡惟庸詳丞相洪武三年任

丁玉直隸

人初名國珍元末仕韓林兒爲御史

國初用爲九江知府彭澤山民叛玉聚鄉兵敗之事聞 賜鞍馬以其有武略轉爲指揮更名玉屢立戰功陞都指揮使洪武六年遷中書省叅知政事九年陞右御史大夫十二年轉左詳左御史大夫

馮冕河南懷慶府孟縣人洪武初年以儒士舉授樂城縣丞歷春坊贊善六年陞中書省叅政詳國初刑部尚書

殷哲見左丞洪武十二年任

國朝卿紀卷之五

開國侍臣序

國初稽古右文設翰林院職官以文學承顧問出入侍從因得
參謀議納諫誨其職清而地禁至洪武三年又法唐永徽之制
設弘文館學士十三年又法古四輔之義設四輔官至十五年
又倣宋殿閣大學士之制設大學士凡一時耆舊乘運而奮或
拔自科甲或徵自薦舉或錄自亡國類以所學利見於世或能
或翼或從尸夫之功云

國朝列卿紀卷之五

弘文館學士年表

胡

鉉

武三年任六年致仕
人薦舉洪

劉

基

浙江青田人薦舉歷御史中丞
洪武三年任尋封誠意伯

羅復仁

江西吉水人歸附洪武三年任本年致仕

危

素

江西金谿人故元學士承旨
洪武三年任本年謫和州

睢

稼

書省參政洪武三年任
人薦舉歷中

王本中

舉洪武三年任
人薦

弘文館學士行實

胡鉉字

人洪武三年四月初置弘文館以鉉爲

學士六年賜還鄉

劉基字伯溫浙江青田人年十四入郡庠從師授春秋經人未嘗見其執經誦讀而默識無遺習舉業爲文有奇氣決疑義出人意表凡天文兵法諸書過目洞識其要講性理於復初鄭先生聞濂洛心法卽得其旨歸先生大器之乃謂基父曰吾將以天道無報於善人此子必高公之門矣元至正癸酉舉進士授江西瑞州府高安縣丞揭文安公徯斯見之謂魏徵之流而英特過之將來爲濟時器也基在燕京時聞書肆有天文書一

帙因閱之經夕翼日卽背誦如流其人乃大驚欲以書授之基
曰已在吾胸中矣無事於書也及丞高安有進賢鄧祥甫者精
於天文術數迺以其學授基焉之官以廉節著發奸摘伏不避
強禦爲政嚴而有惠小民自以得基爲慈父而豪右數欲陷之
時上下咸知其廉平卒莫能害也新昌有人命獄府委基復檢
案實得其故殺狀初檢官得罷職罪其家倚蒙古根脚欲中基
以復讐江西行省大臣素知基遂辟爲職官掾史以讜直聞後
與幕官議事不合遂投劾去隱居力學至是而道益明後爲江
浙儒學副提舉爲文省考試官頃之建言監察御史失職事
臺憲所沮遂移文決去嘗遊西湖有異雲起西北光映湖不

至誠以固士心且天道後舉者勝宜伏兵伺隙擊之取威制敵以成王業者在此時也 上遂用其策乘東風發伏擊之斬獲凡若干萬 上以克敵之功賞基悉辭不受中書省設御座將奉小明王以正月朔旦行慶賀禮基大怒罵曰彼牧豎耳奉之何爲獨不拜適 上召基遂陳天命所在 上大感悟乃定征討之計復將討友諒於九江基曰金星在前火星在後克之必矣 上大喜遂攻皖城自昏達旦不拔基以爲宜逕拔江州

上遂率軍西上陳氏率其屬走湖廣江州平 上使都督馮勝將軍攻 城命基授方略基書紙授之使夜半出兵云至某所見某方青雲起卽伏兵頃有青雲起者卽戰伏也慎勿妄動日中

後黑雲漸薄回與青雲接者此賊歸也卽啣枚躡其後擊之可
盡擒衆初莫肯信至夜半詣所指地果有雲起如基言衆以爲
神莫敢違竟拔城擒賊而還王漢二以饒信降 上命基撫之
陳氏洪都守將胡廷美使其子納降請禁止若干事 上初有
難色基自後踞所坐胡床 上意悟許之廷美遂以城降初基
聞母富氏喪悲慟欲卽歸 上以書慰留之期以成功基不得
已遂從征伐至是辭歸 上遣禮官伴送累使帛祭恩禮甚隆
時酋軍反金華括蒼殺守將胡大海耿再成孫炎等衢州或謀
翻城應之守將夏毅懼無所措會基至卽迎入城一夕定之卽
發書金處屬縣諭以固守所部遂同邵平章榮諸軍克復處城

擒苗帥賀仁德李佑之處州平基至家營葬事時與所親論

上必當有天下之狀於是鄉里及隣近郡縣翕然心服方氏雖據
溫明三郡其士大夫皆仰基如景星慶雲其小民亦未嘗不懷
其舊德也方氏素畏基名時遣人致書奉禮不敢受使人白於
上上因令基與通問因宣國家威德方氏遂納土入貢 上時使
人以書訪軍國事卽條答悉合機宜某年月日赴京道經建德
今嚴州也適張氏入寇時曹國公守建德欲奮擊之基乃使勿
擊曰不出三日賊當自走追而擊之此成擒也比三日黎明基
登城望之曰賊走矣衆見其壁壘旗幟皆如故且聞嚴鼓聲疑
莫敢輕動基趣使疾進兵至則皆空壘擊鼓者乃所掠老幼耳

遂窮追賊至東陽悉擒之以還基至京時陳友諒據湖廣張士誠據浙西皆未下衆以爲蘇湖地肥饒欲先取之基曰張士誠自守虜耳陳友諒居上流且名號不正宜先伐之陳氏旣滅張氏如囊中物耳會陳氏復攻洪都 上遂伐陳氏因大戰彭蠡湖勝負未決基密言於 上移軍湖口期以金木相犯日決勝上皆從之陳氏遂平 上還京定計取張士誠因定中原拓土西北基密謀居多 上或時至基所屏人語移時乃去雖至親密莫知其由命爲太史令一日基見日中有黑子奏曰東南當失一大將時叅軍胡深伐福建果敗沒他日基見 上上方欲刑人基曰何爲 上語以所夢基曰三人頭上有血是衆字頭上

有血以土傅之乃得土得衆之象應在夢後三日當有報至

上遂留所欲刑之人以待之三日後海寧以城降果如基言捷至

上大喜悉以所留人俾基縱之笑惑守心羣臣皆震懼基密奏於

上宜罪已以回天意次日 上臨朝卽以其語諭羣臣衆心始安

後大旱 上命訊獄凡平反出若干人天應時雨 上大喜因

奏請宜立法定制 上從之張士誠平後張昶欲亂政乃使人

上書稱誦功德勸 上宜及時爲娛樂 上以示基基曰是欲

爲趙高也 上頷之利色動知基得其情也乃使齊翼巖等伺

察其陰事未及登而和先事受誅及司天臺災翼巖因爲書言

之於 上其事多平日基密聞於 上或 上使爲之者翼巖

未之知也書奏 上切責翼嚴斬之遂治黨與盡得其與和通

謀狀 上適以事責丞相李善長善長使凌悅因彈之基爲 上

言李公勲舊且能輯和諸將 上曰是數欲害汝汝乃爲之地

耶汝之忠勲足以任此基叩頭曰譬如易柱必須得大木然後

可若束小木爲之將速顛覆以天下之廣宜求大才勝任者如

臣鴛鈍尤不可爾 上怒遂解洪武元年正月 上登大寶於

南郊基密奏立軍衛法外人無知者尋拜御史臺中丞兼太子

贊善適中丞章溢奏定處州七縣稅糧比宋制畝加五合 上

特命青田縣糧畝止五合起科餘准所擬且曰使劉伯溫鄉甲

子孫世世爲美談也或言有殺運三十年未除者甚慨然曰使

我任其責掃除弊俗一二年後寬政可復也 上幸鳳陽使基
居守基志在澄清天下乃言於 上曰宋元以來寬縱日久當
使紀綱振肅而後惠政可施也乃命憲司糾察諸道基素剛嚴
彈劾無所避凡中書內府闈人吏胥有犯卽捕治宦者監工不
肅及府衛舍人奕棋基啓 皇太子悉實於法案劾中書省都
事李彬侮法等事罪當死丞相李善長素愛彬乃請緩其事不
聽遣官齎奏詣行在 上從其議處彬刑基承旨斬之由是與
李善長大忤 上回京李善長愬之基乃求退 上命歸鄉里
基奏曰鳳陽雖帝鄉然非置都之地王保保雖可取然未易輕
也願聖明留意焉遂辭歸後定西失利王保保竟走沙漠 上

手詔叙基勲伐且召赴京師同盟勲冊略曰爾從朕於羣雄未定之秋居則匡輔治道動則仰觀天象察列宿之羅布驗日月之光華發蹤指示無征弗克攻皖城拔九江撫饒郡降洪都取武昌平處州爾多力焉至於彭蠡鏖戰砲聲如雷鬼神悲號星日晦冥自旦至暮如是者四爾時在舟中備嘗患難今久而未至朕心慊焉命駕一來朕心良慰比至京師上賚賜甚厚追贈祖父爵皆永嘉郡公累欲進基爵基曰陛下乃天授臣何敢貪天之功聖恩深厚榮顯先人足矣遂固辭不敢當上知其至誠不强也上欲相楊憲基與憲素厚以爲不可上怪之基曰憲有相才無相器夫宰相者持心如水以義理爲準

德而已無異焉者也今憲不然能無敗乎 上曰汪廣洋何如
恭曰此器局褊淺觀其人可知曰胡惟庸何如恭曰此小犢將
儻轅而破犁矣 上曰吾之相無踰於先生恭曰臣非不自知
但疾惡太深又不耐繁劇爲之且孤大恩天下何患無才願

明主悉心求之如目前諸人臣誠未見其可也 上嘗與論兵曰
克敵在兵制兵在將兵無節制則將不任將非其人則兵必敗
是以兩軍之間決生死成敗之際有精兵不如良將恭曰臣每
觀廟算初謂未必皆然及摧鋒破敵動若神明臣由是知將之
勝又不若主之勝然 陛下不拘古法而勝尤人所難 上曰

兵者謀也因敵制勝豈必泥於古哉戰陳之事闔闢奇正頃刻

變化如風雲之無常勢要在通其變爾三年七月授弘文館學士十一月進封誠意伯四年正月賜歸老鄉里二月至家遣長子璉捧表詣闕謝恩是年八月蜀平復遣璉進賀平蜀表頌上仍以文答之八月上使尅期以手書問天象事基悉條答其大意以爲霜雪之後必有陽春今國威已立自宜少濟以寬書奏上悉以付史館其書稿併已前奏請諸稿皆焚之莫能得其詳也初基言於上甌括間有隙地曰淡洋抵福建界之三魁元末頑民負販私鹽因挾方寇以致亂累年民受其害遺俗猶未革宜設巡檢司守之上從之及設司頑民以其地係私產且屬温州界抗拒不服適若洋逃軍周廣三辰

御史持府縣事匿不以聞基令長子璉赴京奏其事逕詣上
前而不先由中書省時胡惟庸爲左承掌省事因挾舊忿欲構
陷之乃使刑部尚書吳雲林老吏訐基乃謀以基欲求淡洋爲
基地弗與則建立司之策以逐其家庶幾可動上聽遂以爲
案奏賴上素知基置不問省部逮其長子獄上時已勅璉
歸及奏上曰旣歸矣免之基入朝惟引咎自責而已先是楊
憲敗後汪廣洋爲丞相未幾而貶廣東乃相惟庸基乃大感嘗
謂人曰使吾言不驗蒼生之福也言而驗者其如蒼生何遂憂
憤而舊疾愈增洪武八年正月胡丞相以醫來視疾飲其藥二
服有物積腹如卷石遂白於上上亦未之省也自是疾遂篤

三月 上以基久不出遣使問之知其不能起也特 御製爲
文一通遣使馳驛送鄉里居家一月而薨享年六十五遺文郁
離子十卷覆瓿集二十四卷寫情集四卷長子璉集所遺文稿
五卷名曰犁眉公集基未薨前數日乃以天文書授使服闋進
且戒之曰勿令後人習也復命謹之語次子仲璟曰胡惟庸必
敗我欲奉遺表無益也日後 上必思我待有問當密爲我奏
其略以爲修德省刑祈天永命且爲政寬猛如循環耳諸形勝
要害之地宜與京師聲勢相連絡幸 聖主留意基平生剛毅
慷慨有大節每天下安危則義形於色然與人交遊開心見誠
坦蕩無間至於義所不直無少假借雖親之者以此而忌之

亦以此惟 上察其至誠任以心膂基亦以爲不世之遇知無不言每遇急難勇氣奮發計畫立就外人莫能測其機累贊

上成大功 上嘗臨朝稱之輒逡巡不敢當家居惟飲酒奕棋未嘗自言其功每天象有大變則累日不樂以天下蒼生爲憂喜上天威嚴重惟基抗言直議不以利害休其中 上亦甚禮之嘗

稱爲先生而不名又曰吾子房也廷臣或有過失得譴者密爲救解而免其人或知而詣謝者則拒不納其人不知亦未嘗爲言也居鄉里守義尚節儉多陰德不以富貴驕人初與同郡葉琛胡深章溢金華宋濂同出處有通家之好至於居官任政則各行其志俱以功名顯於世而基與宋公又文章爲當代首稱

云

傳信錄云京師自夏至秋不雨有司禱求不應 太祖曰在京
法司及在外巡撫御史按察司冤枉下人以致天旱遂逮京畿
巡按御史何士弘等至京 命細於馬房及 諭中書省御史
臺都督府言事次日基言三事一曰出陣亡故軍妻數萬盡令
寡婦營居住陰氣鬱結二工役人死暴露屍骸不收三張士誠
投降頭目不合充軍 太祖曰寡婦聽其嫁人不願者送還鄉
里依親工役人釋放寧家投降頭目免充軍役旬日仍不雨
太祖怒曰劉基著還鄉爲民御史按察司官俱令自駕船隻發汴
梁安置被問官吏赦罪還職後得北方欲用舊人乃謂揚意曰

發在汴梁御史等官俱係舊人宜盡用之

詞林記云予觀誠意伯集慨然激歎以爲有子房之風及誦

聖祖之言亦曰吾子房也夫子房椎擊沙中何異伯溫之憤方氏
其受天文於鄧祥甫又何異於圯上老人之三略哉漢之元功
大封子房子房願封留是矣乃特發導引明哲保身始神黃石
之術終從赤松之遊易曰介石不終日貞吉何其智也而伯
溫乃徘徊容與雉權於羅象以齒焚置其忠於國而弗智於身
耶

遵聞錄云 太祖親征陳友諒大破於彭澤與伯溫皆在御
舟以觀將卒搏戰伯溫忽躍起大呼 太祖亦驚起疑其作亂

見伯溫雙手麾之連聲呼曰難星過可更舟 太祖聽其言而更之坐未半餉舊舟已爲敵砲擊碎矣後勝負未決伯溫密言於 太祖曰可移軍湖口期以金木相尅日決勝 太祖從之遂平陳氏

楊文懿公曰子房不見詞章玄齡僅辨符檄公勲業造邦文章傳世可謂千古人豪或疑公遇事胡元專門象數何異訾伊尹之屢就恨周公之多才也

堯

羅復仁字

江西吉水人初從陳友諒爲編修甚見禮遇歲

壬寅 太祖高皇帝兵至九江復仁來降 命侍左右癸卯從

破友諒於鄱陽湖

命齋蠟書招諭臨江袁州諸郡甲辰除中

嘗省諮議性率直每論事指陳得失無所隱避益親信之及武昌久圍不下 上以復仁友諒舊臣 令往招諭其子理復仁至城下號慟不已理怪之使召之入復仁曰今不降大兵且屠城諸民何罪早爲之所則族可保也理由是遂降復招諭江西還爲國子助教以老 賜車出入每宴見 賜坐飲食丙午奉使山西招諭元將擴廓帖木兒前使多被拘留復仁議論慷慨獨還洪武元年擢編修二年冬齋 詔諭安南命毋侵占城旣至曉以大義安南王悅服還贈以黃金吉貝復仁辭不受歸奏之上多其廉讓適安南使者至仍令持之以歸改翰林檢閱未幾拜弘文館學士屢 召論事復仁多土音質俚 上以其率

直多見聽納尋乞休 賜大布之衣書曰性雖粗率忠直可嘉

賜爾布衣放歸田里仍賜玉帶名馬鐵柱杖坐墩諸物 上嘗

幸其第復仁方操塗具急呼其妻取爇故 上每呼爲老實羅

云

詞林記云馬援有言非惟君擇臣臣亦擇君夫中原鼎沸醜虜
羶汗羣雄角力未知鹿死誰手復仁乃能辭其故主翊戴真龍
推心置腹直見本真綸綍之褒非溢美也

危素字大朴江西撫州府金谿人年十五能究五經大旨與同
郡葛將曾堅黃暉更相策勵乃從吳沉范梈遊遂知名薦入經
筵爲檢討歷陞學士承旨榮祿大夫知制誥奏請加封朱考亭

楊龜山李延平真西山蔡九峯從祀俱從其論 國初徐達收
燕京令故臣咸投告身素與編修黃暉誓死於難有報國寺僧
梓者救之乃免而暉竟死矣達乃以素歸 上雅聞素文學仍
命爲侍講學士因進言宋朝諸陵爲元西僧所發以理宗頂骨爲
飲器 上聞之惻然曰宋南渡諸君無大失德與元又非世讐
旣乘其弱取之何乃縱奸人肆酷如是耶卽命守將吳勉訪索
頂骨得之僧廬 命有司厝於京城之南紹興亦以永穆陵圖
來獻 命掩瘞故處冬十月時值甘露降宋濂爲頌 上問素
此何徵也素曰王者愛養耆老則甘露降而松栢受之尊賢容
衆則竹蕙受之今甘露降於松是 陛下養老所致也宜以制

幣冊告 宗廟頒於史館以永休聞尋坐失朝免三年四月起

原官 命素及胡鉉睢稼王大中俱爲弘文館學士鉉告歸素

撰、皇陵碑以獻 上念其老 賜小車免朝謁時從論說經

史質証疑義御史王著等劾素亡國之臣不宜居侍從乃謫居
和州之含山縣五年二月以疾卒所著有宋史稿元史稿文集
五十篇奏議三卷

詞林記云素仕元秉文衡都樞要學者仰之如星鳳及徐達收
燕薊命仕元者投告身素與編修黃暉約死於難暉死而素背
約焉及至躋顯榮陟清華愧東閣之履聲慄南滁之汗顏自經
於溝瀆而不知恥莊生有言哀莫大於心死素之謂矣

餘冬序錄云危大朴素黃殷士學皆撫之金谿人少同學問至
正中危仕至中書叅知政事翰林學士承旨黃翰林侍制洪武
元年八月 天兵定燕都危走所居報恩寺俯身入井寺僧大
梓等挽出之謂曰國史非公莫知公死是死國之史也危由是
不死垂老喪節黃投居賢坊井中從人張午下救負以出爲獻
歎曰君小臣而死社稷耶黃曰齊太史兄弟皆死小官彼何人
哉午終不解還舍置酒殺使家人歌舞爲勸環守至日晏會大
將軍徐達下令勝國之臣俱輸告身黃給午取告身若欲輸官
午喜出及還求弗得亟往視井黃已死午買棺入殮僧梓與營
葬焉危黃事始同而終異如此其墓碑皆宋景濂氏爲銘之危

初爲禮部尚書每陳得失自云吾不畏丞相畏後世史官耳元
亡史存景濂云皆危力也嗚呼危故史官知畏史力能存史然
得罪元史深矣元史初成無直筆其乃來君子之議乎若黃乃
真無媿齊太史者僧梓拯危何如送黃之爲義雖然梓非所責
黃固梓之人也濂作大樸銘多假借詞無乃過乎後世並與銘
殷士者觀之死榮生辱自霄壤矣

睢稼字

人國初人仕任監察御史以文學侍

左右多所啓沃授翰林應奉洪武二年陞中書省叅知政事冬
十月十三日甲戌宵露降於乾清宮後苑蒼松之上丙子日本
善長率羣臣稱賀帝曰甘露之降載在往諫然休咎之徵當

以類應朕惡足以致斯卿等爲朕明言之稼對曰聖人之德上及太清下及大寧中及萬民則膏露呈瑞 陛下敬恭天地輯和人民故天不愛寶使嘉祥徵顯也 帝推而不居三年改弘文館學士日與劉基羅復仁危素胡鉉王本中同居館中時資獻納 年致仕

王本中

人薦舉洪武二年任

圖列

國朝列卿紀卷之六

國初侍臣四輔官年表

安

然

河南祥符人元左丞來附
洪武十三年任十四年卒

王本

春官兼太子賓客本年北極刑
洪武十三年任

李榦

山西絳州人故元編修洪武
十三年任本年調蘇州知府

杜敦

山西壺關人耆儒洪武十三年
任夏官兼太子賓客本年致仕

李祐

山西安邑人耆儒洪武十三年
任春官兼太子賓客本年致仕

龔敦

江西鈴山人耆儒洪武十三年任春官兼
太子賓客十四年以疾歸歷國子祭酒

趙民望

直隸藁城人耆儒洪武十三年任
夏官兼太子賓客十年以老致仕

吳源

福建莆田人耆儒洪武十三年任夏官
兼太子賓客本年以老歸起國子司業

何顯周

直隸內黃人者儒洪武十五年任本年致仕

國初侍臣四輔官行實

安然字

河南開封府祥符縣人徙居直隸鳳陽府潁州

季爲山東行省左丞守萊州大軍下山東然率衆歸附洪武元年授起居注轉給事中尋擢山東行省叅政立心平正撫綏勤勞祿止養身餘以給公用二年召還爲工部尚書三年正月奉命於社稷壇北建祭殿五間又建拜殿五間以備不測風雨祭祀八月建議功臣守墓人戶各以本官封爵品級爲差其合用石碑石獸之數亦令有司依品級成造上從其議尋詔功臣故不建享堂墳塋葬具皆自備惟戰沒者官給之五年調河南叅政九月改行省爲布政使司陞浙江布政使十二年陞御史臺

右大夫十三年革左右御史大夫改左中丞夏五月癸巳坐事
免官還鄉未幾復召爲四輔官每論事 賜坐多所裨益十四

年秋八月庚申以疾卒年五十八 上念來歸之誠親製文遣

官祭之其略曰爾中土之士當元季從事義旅效力於元及元

運既終我師長驅齊魯是以棄胡歸我其來甚誠朕用爾嘉數

授重位嘗干於法朕特釋之昨爲朝無舊臣復召爾來所望加

誠事朕何其遽以疾終朕思初歸之義以牲醴致奠爾其享之

王本字 人 洪武十三年以吏部尚書

范敏薦召至京勅曰朕觀上古君臣必正直無私心同氣合方

乃上悅天心下忻地祇致海嶽效靈於是乎經邦論道永安社

稷利濟生民臣亦昌焉朕衣布衣遇天更元運偶與羣雄並驅
逢多難遇深艱率英俊自中土渡江東造基於此君天下子庶
民十有三年矣永惟致治必在得人乃訪近臣而求士得爾諸
儒來朝朕甚欲與賢者周旋以安寰宇然知人之道堯舜猶難
苟面從志異無利濟之誠則不惟昊天昭鑒實有孤於朕懷故
勅爾羣儒若志秉忠誠則可交於神明與朕同遊以安天下豈
不偉哉乃以本任春官兼太子賓客既而上坐武英殿西廡
召見諸儒使各言其志本等對曰爲士者貴幼學壯行然求之
往昔懷致君澤民之志而不遇明主道不行功不立徒湮沒於
世如此人者豈不惜哉今臣等草野愚陋學不足以明道才不

足以經世誤蒙 聖上以儒臣召與圖治道臣等遭遇恩榮誠
千載一時慶幸何如若不思報稱是自棄於明時何以稱士
上悅故授以是職告於太廟十月勅本等竭力忠誠以感格天心
十四年正月命刑官聽兩造之辭果有驗罪正以五刑議定然
後入奏既奏錄其所授之旨送四輔官諫院官給事中覆覈無
疑然後覆奏行之有疑讞則四輔官封駁之者爲令九月 上
謂四輔官王本等曰天道福善禍淫不言而見君有德而降祥
以應之不德其降災以警之故天之於君猶父之於子子不善
而警之安敢不懼益謹懼無違猶慮有非常之災若恣肆不戒
豈能免當然之責朕與卿等皆當慎之後坐極刑

李幹字

山西平陽府絳州人元翰林院編修改國子監博

士退居於鄉

國朝洪武九年授本州儒學訓導十三年遣

勅召之曰朕卽位十三年夙夜孜孜思得賢才共安天下何期大臣不職朋比爲奸雖四凶之罪已誅而求賢之意未稱今御史薦爾博學洽聞特遣使齎符臨召有司禮送至京副朕虛懷至授四輔官十三年調蘇州府知府改國子博士兩聘爲考試官後以老致仕

杜敏字

山西潞州府壺關人年十五善屬文勤慎好學精

通易書詩三經元末省院屢辟不起入

國朝洪武十三年以

尚書范敏薦其學行特

勅徵之諭曰昔之御宇內者無倖位

無遺賢致時和而世泰蓋由善備耳聰目明之道所以士人者樂從其遊輔之以德間有非哲者處於民上則倖位遺賢亦備矣今朕才踈迷聖道之良宗是致賢隱善匿民未康世未泰今爾博學君子齒有年矣符到若精力有餘則策杖來朝果可作爲加以顯爵與朕同遊比至京陛見 上諭曰昔有耕莘者爲政社稷永安築巖者在朝君仁民康斯二賢登出於殷商致君六百年之大業是賢者雖處同出異其忠君濟民之道則一然朕政未施訪近臣而求士召爾等來朝命爲四輔官兼太子賓客位列公侯都府之次必欲均調四時德合人天卿等慎之同安盛世及蒞任 上又諭曰受斯重任朕與卿等民生係焉可

不重乎且卿等昨爲庶民今輔朕以掌民命出類拔萃以顯父母豈不天人交慶於戲慎哉二儀之敬事理無乖心常格神言常履道故茲再諭想宜知悉未幾命敦司夏季三月皆上旬十日每入見 賜坐講論治道 上嘗幸第及屢賜珍饌襲衣又嘗賜遊東苑 上親與賡詩後以老病告歸卒於家所著有聯時集

李祐字

山西平陽府安邑縣人以孝行重於鄉爲時宿儒

洪武十三年以吏部尚書范敏薦其賢 召授四輔官兼太子

賓客未幾 命祐司春季三月皆中旬十日 太祖諭曰古以

三公四輔論道經邦理陰陽順四時然當是時間有陽順陰乖

陰順陽戾者有之是由逆理而使然也且任三公職四輔非數人不居凡數人使居是任豈不善惡半之善雖格天惡能違帝是故人事不齊天亦如之而應此其所以陰陽駁雜也當陰陽駁雜之時所當理者三公四輔冢宰既多各無司定節序期其時而究將問誰假使上帝以一賢之善不致斑駁其時則惡人偷光飾已又小人效之所以斑駁其時雖在上帝不得不如是也其天道人事疾如影響爲此也朕今設四輔恐上帝艱分善惡累時序之不常特以四季均職於四輔又以上中下三旬人各司之設若上帝福善禍淫易爲缺着所司者地之混殺豈不利哉特以四輔所司明述於後以驗雨暘時若也

同杜敷等侍食殿庭 賜衣三二 後以老疾還鄉甲子丁卯庚午三科考本布政司鄉試衆稱其得人未幾以疾卒於家

龔敷字文達江西廣信府鉛山縣人學問該博德行敦實洪武初以明經任府學教授御史葉孟芳高其學行薦至京師十三年會雷震謹身殿欲調和陰陽拜四輔官兼太子賓客位列公侯之次諭令德合天人以臻至治未幾 命司春季三月皆下旬十日敷同杜敷李祐吳源趙民望並以耆老人侍屢荷眷養十四年因春令頗愆遣歸後起博士歷司業祭酒詳國初國子

監祭酒

趙民望字

直隸真定府藁城縣人洪武四年有司以儒士

舉因疾遣歸後遊學山西澤州陵川縣十三年 太祖特賜勅
徵之且獎之曰朕惟才疎以致賢隱善匿民未康世未泰爾可
策杖來朝與朕同遊比至拜四輔官兼太子賓客未幾勅司夏
三月皆下旬十日與杜斆等親侍左右講論治道裨益良多後
以老致仕

吳源字性博福建興化府莆田縣人洪武初舉明經授興化府
學教授十三年召徵四輔官兼太子賓客司夏季三月皆中旬
十日尋以老病告歸十四年起國子司業本年卒於官

何顯周字

直隸大名府內黃縣人以文學老成重於鄉

武十五年以薦舉召爲右正言兼右春坊右諭德尋進四

賜坐講論治道 賜襲衣 命工圖其像 賜待漏院記及誥命
以旌之後以疾致仕

國朝列卿紀卷之六終